

Di şûna sergotarê de

(nêrîna Kurdistanê ji rapora Baker-Hamilton)

1. Nehatina komîsyona James Baker û Lee Hamiltonî bo Kurdistanê, ji ber çî sebebî dibe bila bibe, kêmasiyeka mezin bû û wisa li ravekirinên wê raporê kiriye ko pêbawerîya xwe ji dest bide.

2. Di pêşniyara hejmara 26-ê de wê grupê daxwaza jinûvelênêrîna destûrê bi beşdarbûna pisporên Neteweyên Yekgirtî kiriye.

Her jinûvelênêrîneka destûra Îraqê divêt di çarçeweya wê mekanîzmayê de be ko di destûrê bi xwe de behsê hatiye kirin. Ji bilî vê em hemî rengên destkariyê red dikin û divêt hemî alî bizanin yekîtiya axa Îraqê bi pêbendbûna vê destûrê ve girêdayî ye.

3. Di pêşniyara hejmara 28-ê de behsa wê yekê hatiye kirin ko qezenca ji petrolê bikeve bin desthilata hikûmeta merkezî de û li ser esasê hejmara niştetichan bêt dabeş kirin, herwiha ko desthilata herêmî bi ser bîrên petrolê yên nû de digel lihevhatina niştimanî nagunce.

Di heqê vê pêşniyarê de, em pêbendbûna xwe bi wê destûrê ve dubare dikin ko rêyeka minasib destnîşan kiriye û em hemî rengên destkariyê tê de red dikin.

4. Di pêşniyara hejmara 30-ê de ko di heqê Kerkûkê de ye, rapor behsa paşvedana bicihkirina madeya 140-ê dike û têt xwestin ko çareserîya vê meseleyê bikeve ser milê "Grupa nêvneteweyî ya piştgiriya Îraqê" ko di raporê de daxwaza avakirina wê hatiye kirin.

Qenaeta me ew e ko destûrê mekanîzma û dema bicihkirina madeya 140-ê diyar kiriye ko ev jî kêmtirîn tişt bû ko kurd pê hatin razî kirin, ji ber hindê jî her paşvedanek di prosesa bicihkirina wê madeyê de xetereka pir mezin peyda dike û bi ti awayî ew ji aliyê xelkê Kurdistanê ve nayêt qebûl kirin.

5. Di hemî raporê de behsa giringiya xurtkirina hikûmeta merkezî û lawazkirina desthilata herêmî hatiye kirin ko ev bi xwe jî li dijî prensîpên federalîzm û destûrê ne ko Îraqa nû li ser hatiye ava kirin. Li vê derê em dubare dikin ko awayê federalîzmê rêya tenê ya parastina yekîtiya Îraqê ye.

6. Li çend cihên raporê de bi aşkerayî berjewendî û tirsê welatên cîranên Îraqê hatiye berçav kirin û daxwaza roleka zêdetir ya wan welatan hatiye kirin ko bi qenaeta me ew li dijî berjewendiyên gel û axa Îraqê ye, nemaze berjewendiyên gelê Kurdistanê, û ev desttêwerdanek e jî di karûbarê Îraqê de.

7. Di hinek niqteyên raporê de wekî pêşniyara hejmara 27-ê û 35-ê daxwaza wê hatiye kirin ko ew aliyên ko li dijî prosesa siyasî bûn û karê şidetê kirine, bîn xelat kirin û ew jî bi beşdarkirina wan di hikûmetê û desthilatê de ko li gor qenaeta me ew jî li dijî berjewendiyên piraniya herî zêde ya xelkê Îraqê û demokrasiyê ye.

8. Digel spasî û pêzanîna me bo serokê Dewletên Yekgirtî yê Emerîkayê George W Bush û îdareya emerîkî di roxandina rejîma berê û mihaweyeyên wan di avakirina Îraqa nû de, em wisa dibînin ko komîsyona James Baker û Lee Hamiltonî hinek pêşniyarên nerealîst û nelicîh pêşkêş kirine ko goya arîkariya Emerîkayê dikin da ji tengasiyê derkeve.

Heger bi van nêrînan bixwazin wan pêşniyarên nelicîh li ser me ferz bikin, hingê em bi navê xelkê Kurdistanê radigihînin ko tiştê li dijî destûr û berjewendiyên Îraqê û Kurdistanê be em qebûl nakin.

9. Ev rapor berovajî wan gotinan e ko rêzdar James Bakerî bi telefonê ji me re behsê kiribû û gotibû ko di raporê de behsa liberçavgirtina xweseriyên Kurdistanê hatiye kirin. Herçend berî derketina raporê me fikr û qenaetên Kurdistanê diyar kiribûn lê belê komîsyonê ti giringî nedaye nameya me û nexwendiyê jî.

Di dawiyê de em dibêjin:

— Em bi ti awayî pêbendê vê raporê nabin.

— Çênabe ko prosesa demokrasîyê û destkeftên gelê Îraqê û bi taybetî yê gelê Kurdistanê bêne berterf kirin, û nemaze piştî hilbijartin û destûrê ko ji aliyê % 80-yê xelkê Îraqê ve hatiye qebûl kirin û civaka nêvneteweyî û berî hemîyan Dewletên Yekgirtî yê Emerîkayê piştgiriya wê kiriye.

— Berî ko çareserîya problemên Îraqê ji aliyê xelkên dî ve bêt kirin, bila ji aliyê îraqîyan bi xwe ve bi rêyeka rasteqîn bi lihevhatineka niştîmanî bêt kirin û ji bo vê jî em daxwazê li hemî hêzên îraqî dikin ko ewên bawerî bi prosesa siyasî û destûrê, û îraqeka federal û demokratîk hebin bila pêngavên esasî ji bo çareserkirina van probleman bavêjin da ji çareserî û pêşniyarên xelet yê welatên herêmî û cihanî rizgar bibin.

2006-12-07

Mesûd Barzanî

Serokê herêma Kurdistanê